

## Morning Dogri (NSD) Bulletin 21-07-2025

### आकाशवाणी

- संसद दा बरसांती आहली इजलास अज्जै थमां शुरू होइए 21 अगस्त तगर चलोग।
- असम सरकार नै डेयरी खेतर गी बदाने दे मकसद कन्नै दुध दी सब्सिडी कार्यक्रम शुरू कीता ऐ, जेदे च करसाने गी 5 रपे फी लीटर दी सब्सिडी थहोग।
- आई.एम.एफ नै दस्सेआ ऐ जे भारत तेज भुगतान च वैश्विक अगुआ बनी गेआ ऐ। यू.पी.आई नै इस बरै 18 अरब शा मता लैन-देन दर्ज कीता ऐ।
- चालू माली बरे दी पैहली तिमाही च भारत दे इलेक्ट्रानिक्स निर्यात च 47 फीसदी दा बाददा होआ ऐ।
- बुडापेस्ट कुश्ती प्रतियोगिता 2025 च भारत दे सुमित नै चांदी ते अनिल मोर नै कैह दा तगमा जित्तेआ ऐ।
- कोनेरु हम्पी नै फिडे महिला शतरंज विश्व कप-2025 दे सेमीफाइनल च पुज्जने आहली पैहली भारती महिला दे रूप च इतिहास रचेआ ऐ।

<><><><><><>

### Monsoon-Session

संसद दा बरसांती आहला इजलास अज्जै थमां शुरू होआ करदा ऐ ते एह औंदी 21 अगस्त तोहड़ी जारी रौहग।



राज्य दे संसदीय मामलें दे मंत्री विजय कुमार चौधरी होरें आखेआ ऐ जे सरकार विपक्ष पासेआ पुट्टे जाने आहले सब्बे मुद्दें दा परता देने आस्तै पूरी चाल्ली तैयार ऐ। तोआई, विधानसभा अध्यक्ष नंद किशोर यादव होरें विपक्ष गी अपील कीती ऐ जे ओह सदन दी कार्यवाही सुचारू ंगै सिर चलाने आस्तै सहयोग करै।

<><><><><><>

### Monsoon-Goa

गोवा विधानसभा दा बरसांती आहला सत्र बी अज्जै थमां शुक्य होआ'रदा ऐ। एह सत्र 8 अगस्त तगर चलोग। इस दरान शासन, विकास ते जन कल्याण कन्नै जुड़े दे प्रमुख मुद्दें पर व्यापक चर्चा होने दी मेद ऐ। सत्र बड़ा मता व्यस्त ते हंगामेदार रौहने दी संभावना ऐ कीजे सरकार गी 4 जहार शा मते सवालें दा सामना करना पौग। सत्र च सरकार 16 विधेयक पेश करोग।

<><><><><><>

### Assam-CM Milk

असम दे मुखमंत्री हिमंता बिस्वा सरमा होरें डेयरी करसानें दी आत्मनिर्भरता बदाने ते राज्य च श्वेत क्रांति आहनने आस्तै कल गुवाहाटी च श्रीमंत शंकरदेव काला क्षेत्र च इक नमी योजना दी शुरूआत कीती।

उनें पच्छमी असम दे दुध उत्पादके दी प्रसंस्करण समर्थ दूनी करने आस्ते  
कार्जक्रम तैहत भूमि पूजन कीता। शुरू कीती गेदी स्कीम तैहत दुध उत्पादन  
आहले करसाने गी 5 रपे फी लीटर स्हाबै सब्सिडी हासिल होग। एह रियायत  
उनेंगी हासिल होग जेड़े सहकारी सोसायटिएं गी प्रसंस्करण लेई दुध उपलब्ध  
करोआंदे न।

<><><><><><>

#### IMF-UPI

अंतरराष्ट्रीय मुद्रा कोष नै आखेआ ऐ जे भारत यूनिफाइड पेमेंट इंटरफेस  
यू.पी.आई कन्ने तेज भुगतान प्रणाली च दुनिया भरै च सब्बनें थवां अगगे ऐ।  
जून म्हीने च एहदे राएं 24 लक्ख 3 जहार करोड़ रपे थवां मते दा भुगतान  
होआ ऐ। बददे खुदरा डिजिटल भुगतान बारे अंतरराष्ट्री मुद्रा कोष दी हाल दी  
टिप्पणी मूजब यू.पी.आई कन्ने भारत दी भुगतान प्रणाली च क्रांतिकारी बदलाव  
आया ऐ।

<><><><><><>

#### Electronics-Expert

चालू माली बरे दी पैहली तिमाही च भारत दी इलेक्ट्रानिकी चीजे दे निर्यात च  
47 फीसद दा बाद्दा होआ ऐ ते एह 12 अरब 47 करोड़ डॉलर मूल्य दा होई  
गेआ ऐ।

एह वैश्विक विनिर्माण केंद्र दे तौरा पर देशों दे स्थापित होने दी सारत ऐ।  
वाणिज्य मंत्रालय मूजब इस माली बरे दी पैहली तिमाही च अमरीका, संयुक्त  
अरब अमीरात ते चीन त्रै शीर्ष थाहर दे तौरा पर उभरे न। नीदरलैंड्स ते जर्मनी  
इलेक्ट्रानिकी निर्यात आस्तै होर दुए प्रमुख गणतव्य न। भारत सोयां 60 फदसद  
मती इलेक्ट्रानिक चीजें दा निर्यात अमरीका गी कीता गेआ ऐ।

<><><><><><>

### Amarnath-Yatra

जम्मू थमां अज्ज बड्डलै सख्त सुरक्षा बंदोबस्तें हेठ अमरनाथें दे 3 जहार 791  
श्रद्धालुएं दा इक होर जत्था कश्मीर घाडी लेई रवाना होआ। जम्मू दे भगवती  
नगर आहले आधार शिविर “जातरी निवास” थमां लौहिकएं-बड्डिं कुल 148  
गड्डिं दे काफले च रवाना कीते गेदे इनें श्रद्धालुएं च 3 जहार 67 मर्द, 522  
महिलां, 9 न्याणे, 153 साधु, 39 साध्वियां ते 1 ट्रांसजेंडर शामिल ऐ। इन्दे चा 1  
जहार 208 श्रद्धालु बालटाल ते 2 जहार 583 श्रद्धालु पैहलगाम आहले रस्तेया  
पवित्तर गुफा लेई अपना अग्गे दा सफर शुरू करडन।

<><><><><><>

### Kanwar-Yatra

कांवड जातरा अपने अखीरले गेड़ च पुज्जी गेई ऐ। कांवड़ियें दी बड़ी बड्डी  
गिनतरी च भगवान शिव गी अर्पित करने आस्तै गंगाजल लैने गितै हरिद्वार  
च किट्ठे होए दे न। डाक कांवड़ियें दी गिनतरी बी लगातार बदा करदी ऐ।

पुलस नै भीड़ गी नियंत्रित करने आस्तै व्यापक प्रबंध कीते दे न। हुन तगर  
पाई करोड़ शा मते कांवड़िएं पवित्तर गंगा जल लैने दे बाद अपनी तयशुदा  
मंजिल लेई रवाना होई गेन।

<><><><><><>

### Israel-Strike

इस्राइली फौज नै हमास दे कमांडर बशर थाबेत दे मारे जाने दी घोशणा कीती  
ऐ। थाबेत हथियारें दे अनुसंधान ते विकास कन्नै जुड़े दा हा ते हमास दे  
थेआर विनिर्माण मुख्यालय च ओहदी महत्वपूर्ण भूमिका ही। इस्राइली रक्षा  
बलें सुरंगें समेत आतंकवादी बुनियादी पांचे गी बी तबाह करी दिता ऐ।

<><><><><><>

### Wrestling

भारती पहलवान सुमित नै हंगरी दे बुडापेस्ट च पोलाक इमरे ते वर्गा जैनोस  
मेनोरियल 2025 कुश्ती प्रतियोगिता च 60 किलोग्राम दे ग्रीफो रोमन वर्ग च  
चांदी दा तगमा जित्तेआ। उनेंगी फाइनल च यूरोपीय चैंपियन अजरबैजान दे  
निहात मम्मादली नै 5-1 कन्नै हराया। तोआई, अनिल मोर नै ग्रीको रोमन च  
55 किलोग्राम वर्ग च उज्बेकिस्तान दे इखितयोर बोतिरोव गी 7-4 कन्नै  
हराया ते कैस दा तगमा जित्तेआ।

<><><><><><>

## Women-Chess

कोनेरू हम्पी नै फिडे महिला शतरंज विश्व कप-2025 च शानदार प्रदर्शन करदे होई सेमीफाइनल च पुज्जियै इतिहास रचेआ ऐ। इस प्रतियोगिता दे सेमीफाइनल तगर पुज्जने आहली पैहली भारती महिला खडारन बनी गेइयां न। जॉर्जिया दे बाटुमी च चलारदी प्रतियोगिता च हम्पी नै क्वार्टरफाइनल च चीन दी सोंग युचिन गी हराया। अज्ज क्वार्टर फाइनल च दिव्या देशमुख ते हरिका द्रोणावली दा मुकाबला होग। मैच भारती समें मताबक शामी 4 बज्जियै 35 मिनटें पर खेड्णेआ जाग।

<><><><><><>

## IMD

मौसम विभाग नै तटीय कर्नाटक, हिमाचल प्रदेश, तेलंगाना ते उत्तराखंड लेई अज्ज भारी थमां मती भारी बरखा पौने दी पेशनगोई कीती ऐ। अगले 2 थवां 3 दिनें दरान दिल्ली, हरियाणा, पंजाब, चंडीगढ़, बिहार, छत्तीसगढ़, केरल, माहे, कोंकण, गोवा, महाराष्ट्र ते पूर्वोत्तर राज्य च बी भारी बरखा पेई सकदी ऐ। मौसम विभाग नै अंडमान ते निकोबार आईलैंड्स, उप हिमालयाई पच्छिम बंगाल ते सिक्किम च अज्ज गरज-चमक कन्नै अंधी झक्खड़ ते बिजली चमकने दी पेशनगोई कीती ऐ। इयै नेय हालात इत्थे इस म्हीने दी 26 तरीक तगर बने दे रौहने दी मेद ऐ।

<><><><><><>